

CONTRA

Kas võru keele iist kõnõlõminõ oll' rassõ? Kuimuudu Sa iist kõnõli?

Oll' rassõ, kõgõ rohkõmb tuu, et naid iistkõnõlõja avvuasju tull' üten kanda. Tuu om väega rassõ, ku esi massinaga ei sõida. Avvuraha oll' iks inämb-vähämb kõik aig üten, a kaigas es olõ piaaigu sukugi.

Kõnõli iist ja takast, nigu iks, veidükese rohkõmb määntsitki asju aruti Molovihun, ja tei tuu kuu inämb-vähämb kõik postitusõ võru keelen, trehvässi Tartu Jaani kerikun võrokiilside nuuriga, säääl kül kullõlsi rohkõmb, ku kõnõli. Prima Vista raamadulaadun sai kõnõt petä, urbanilaadul Urvastõn mulgahti rohkõmb ja möi umma võrokiilset luulõkoko parõmba hinna iist.

Miä iistkõnõlõmisõ man häste lätš, midä Sa tulõvigun tah-tunu viil tetä?

Kõgõ parõmbidõ lätš vast tuu, et Prima Vista kirändüsfestivalil käve Tartu liinapää vastavõtul ja sai võro keelen sõnna võtta, säääl kullõjit oll' iks mitmõlt maalt, a ma inglüse keelen ütli inne paar lausõt ette, kõik muu iks võro keelen.

Tulõvigun – no võiolla võinu rohkõmb võro keelen luulõtusi kirotä, a no tüküsse nä mul iks kõik eesti keelen tulõma. Vai tulõva läti keelen.

Läti kiil om küländ esimuudu fetiš ('asi, midä ülearvo avvusta'). Kas Sul om viil mõni?

Peris fetiš om vast tuu, et joosõ staadioni pääl 10 000 meetrit kotustõn, mis nakassõ V-tähe päält. Edimädse olliva Valmiera, Visby, Viländi ja Ventspils, nüüd om Võrun ja Vahtsõliinan ka tuud tettü, kokko 13 kotust, a esiki Võrumaalt olõssi midä võtta, inne ku naada Vladivostoki vai Valencia pääle mõtlõma. Ma ei tiiä, võiolla om mu karmanitelevhon kah fetiš, egäl juhul mullõ ei miildü nuu vahtsõ, minka ekraani piat nühkämä, ja nuu ei mahu nii häste karmanilõ är, ja umbõlõ tihtsäle piät saina vooluvõrku tsuskama.

Miä Su meelest Võrumaal, Eestin ja maailman võlssi om? Mink iist Sa tenulik olõt?

Ma õkva täämbä mõtli tuu pääle, et ku hää om iks, et meil om neli aastaiga, a ku veidükese viisisi mõtõlda, sis tulõ naid esiki hulka



rohkõmb. Üts asi, mis sitastõ, omgi vast tuu, et inemise viisvä järjest vähämb mõtõlda, a üldä tahtva tuujago rohkõmb.

Väega tenolik olõ, et inemise tahtva tõisi avita, nii minnu, ku näid, kiä periselt hädän. Tuu om muidoki võlssi, et niipallu inemise Eestin ja ka maailman omma vaesõ, a samal aol kulutadas kõgõ rohkõmb rahha tuu pääle, et näid viil vaesõmbas tetä. Ma ligembält tuud edesi ei sellätägi, las egäüts saa arvu, nigu taht ja mõist.

Sääl pümehide Urvastõ mõtsu seen om kirutamisõ jaos õks valgust vaia. Kas Sa kilovatt-tunni hinda ka kaet?

Ma maka sis, ku pümme om. Ma pääst kilo vati hindä ei tiiä, niikavva ku kokku arvõ pääle midägi hirmsat ei tulõ, ma tuu pääle ei mõtlõ. Paistus, et minnu tuu börsikõikminõ ei mõota kah, vast sai umal aol määnegi tark otsus tettüs.

Kas Sa pirrutulõ valgõl olõt kuna midä lugõnu vai kirutanu?

Ku ma peris pirdõ pääle mõtlõ, sis väega miilde ei tulõ. Ku kündle palassõ, sis om kah innemb midägi muud tettü. Vahel, ku olõ tahtnu sängün inne magalõjäämist lukõ, a lülit jääs kavvõlõ, sis olõ kasutanu moblavalgust. Säänest romantikat iks vaia ei olõ, minka läbi võit üüse maha palada.

Kas korgõ eelektrihind om Su kirutuisi kah mõotanu?

No tuun mõttõn iks om, et raamatidõ välläandminõ om kallimbas lännu, viil mitte nii pallu, et midägi olõssi tegemäldä jäänü. A nigu ma joba ütli, mullõ miildüski päävävalgusõn kirota. Ja eelektrist ei paistu üttegi kirätükkü ollõv.

Sa roidat pallu egäl puul ilma müüdä – viisorin ja kirändüs-õdakil ja muial. Ku tihti Sa ummi kundsõ viilit?

Ma ei tiiä, midä tuu kundsõ viilmine tähendäs, tõtõst ei tiiä – ku tandsmist, sis ma väega pallu tandsman küll koskil ei käü. Ummi kundsõ tulõ iks viili, suvõl kasus sinna paks nahk ja nakassõ lahkõ tegünemä, ku perrä ei kae. A kangäkundsa – nuu kulussõ esi. Ma iks käü niipallu ku saa, tuu aig tulõ võtta, ütskõrd õkva mõtli, et taksot telli väega harva, tulõ kallõndri tuu perrä paika säädi, et peris egäle poolõ ei olõki vajja jõuda.

Olõt kõva jalgpalli- vai laembalt spordifänn. Määndse kotussõ pääle võinu Sinnu jalgpalliplatsil panda?

No viimäte ma andsõ jalkaplatsti pääl umma iistkõnõlõja ammõtit Raju Eliisabetilõ edesi. Jalgpallin olõ innembi kaitsõn mängnü. Mängu lahkminõ tulõ mul parõmbidõ vällä ku tuu ülesehitämine, sama lugu om ka majju vai tõisi huunidõga.

Ku sakõstõ Sul tulõ ütsindä lavva takan istun sääne mõtõ, et võtnu palli, mängnü mitmõst vastatsõst müüdä ja virutanu palli õkva ristnukka?

Tuuga lätt innemb nii, et ku pall ristnukka lindas, sis ma naka mõtlõma, et kuimuudu ma nüüd näist olõ müüdä mängnü, ja kas näid üldse om olõman.

A häste saa tujju nõsta, ku võtat vällämõtõldu korvpalli ja viskat tuu vällämõtõldulõ korvi. Tuu tulõ mul nii häste vällä, palli mugu õnnõ tsopsasõ läbi võrgu, et õkvalt tege meeles hääs ja lätt kõik muu ka laabsambalt.

Kas Sa olnu peri tulõvigun võru keelen määnestki jalgpallimängu kommõntiirmä?

Ma tii tuud kõikaig, õnnõ noid ei olõ pallu, kiä tuud päält kuulda. Üts suvõülikuul pruuvsõ mäantsitki võrokiilsit jalgpallisõnnu vällä mõtõlda, a nuu es lää väega rahva sekkä. Esi om mul meelen ka õnnõ üts – *nukalüük* olõssi mu meelest võinu *nukits* olla. A *nukalüük* om esihindäst väega illus sõna.

Ma mõtlõ, ku oll' edimäne mägijalgpalliturniir Mõtsavele talun, sis ma vast säälsõ kommõntiirseg, selle et minnu oll' sinnä kutsutu, õigust mõistsõ ma õnnõ üten mängun, ja ütengi miiskunnan ka ma es olõ, vast ma sis kuigi selläti üks säälsõ midägi.

Mägijalgpall om veidükese mu vällä mõtõldu mäng, selle et ma koskil rahva iin kõnõli, et õigõ Võromaa rahvussport võinu olla mägijalgpall, kos kumbki puulaig tõnõ punt aja palli mäkke üles ja tõnõ alla, ja Mõttusõ Meelis võtsõ tuust mõttõst kinni ja kõrrald' turniiri är.

Urvastõ kihlkunnapääväl sai ka kerigu man suurõ mäe pääl mängu maha peetüs. Ma looda, et tuud är ei unõhtõda ja mägijalgpall saa uma kotussõ suurõn spordipildin.